

Tito

Pablo tabata un persona so. Maske e tabata solamente un solo persona, el a amplia su ministerio dor di su kartanan i dor di su representantenan. Timoteo i Tito tabata representantenan konfiá di Pablo. Nan a bai kamindanan ku Pablo no por a bai. Pablo a manda nan pa yuda un òf otro iglesia, mientras e tabata okupá ku un otro iglesia òf evangelizando otro kaminda. I ora Pablo tabata enkarselá, Timoteo i Tito a kontinuá ku e ministerio. Komo resultado, Pablo su ministerio a hasi un impakto muchu mas grandi.

Pablo a skirbi e karta pa Tito ora e tabata representá Pablo na isla di Kreta. Maske e ta un karta kortiko, e ta un karta impreshonante. Tito a ser yamá “un manual di konseho pastoral sumamente balioso i sin rival.” Martin Lutero a skirbi di e buki di Tito, “Esaki ta un karta kortiku, ma tòg e punto kulminante di doktrina kristian, i skirbí na un forma tan maestral ku e ta kontené tur loke ta nesario pa konosementu i bida kristian.” Palabranan di elogio sumamente impreshonante pa un karta asina kortiku!

I. TRASFONDO DI E BUKI

En bista di e echu ku Tito tabata un di Pablo su koleganan mas yegá, ta interesante ku e no ta mensioná mes den e buki di Echunan, maske nòmber di hopi otro kolega si ta bin dilanti den e buki ei, i maske ku Tito klaramente tabata un partisipante den Pablo su ministerio durante e periodo di tempu ei. Nòmber di Tito ta aparesé 13 biaha den Tèstament Nobo: den 2 Korintionan, Galationan, 2 Timoteo i Tito.

A. BIDA DI TITO

Tito tabata un nòmber latin masha komún den era di Pablo. E Tito ku Pablo a skirbi a nase den un kas kaminda tur dos di su mayornan tabata griegu. E no tabata hudiu (Galationan 2:3). Kisas Galationan 1:21 por indiká ku Tito tabata habitante di Antiokia di Siria debí ku Pablo tabata na Siria nèt promé ku el a hiba Tito na Herusalèm.

Pablo a yama Tito “*mi yu bèrdadero den nos fe komun*” (1:4) indikando ku Tito tabata su yu spiritual. Tito lo a kombertí serka Pablo promé ku (òf durante) Pablo su promé biahe mishonero.

Durante nan promé biahe mishonero, Pablo i Barnabas a prediká ku paganonan por wòrdu salbá sin warda lei di Moisés. Hopi pagano a kombertí. Ma no tur hende den iglesia tabata di akuerdo riba e punto ei. Komo resultado, nan a bai na Herusalèm pa konsultá ku e lidernan di iglesia (Echunan 15:1-2). Pablo i Barnabas a hiba algun otro persona huntu ku nan ora nan a deliberá ku e apòstelnan i ansianonan, komo sifuera pa mostra e lidernan e “trofeonan”

di kalidat ku nan a logra gana pa Kristu entre e paganonan—sin mester sirkumsidá nan. Klaramente Pablo i Barnabas a skohe kreyentenan ehemplar pa kompañá nan pa un konferensia tan importante. Un di e personanan ku nan a selektá tabata Tito (Galationan 2:3). Pues, Tito tabatin oportunitat pa presensia e debate tokante kreyentenan pagano i tende e konklushon ku paganonan tabata bon biní den iglesia sin mester kumpli ku tur e eksigensianan di lei di Moisés, manera sirkumsishon. Siendo griegu, henter e episodio aki lo tabata sumamente importante pa Tito.

Maske Tito su nòmber no ta mensioná komo un persona ku a kompañá Pablo durante su di tres biahe mishonero, ta klaro ku Tito tabata huntu kun'è. Segun 2 Korintionan, Pablo manda Tito for di stat di Efeso pa e stat di Korintio komo su representante, pa trata ku algun problema delikado di e korintionan. Ta parse ku Tito a hasi un impakto positivo na Korintio. E tabatin un interes spiritual spesial pa ku iglesia di Korintio (2 Korintionan 8:16-17). Pablo a yam'è "*mi kompañero i kolaborador meimei di boso*" (2 Korintionan 8:23).

Ora Pablo a bandoná Efeso, e tabata preokupá ku e no a topa Tito na Troas (2 Korintionan 2:12-13). Ma nan a logra topa na Masedonia (2 Korintionan 7:5-16). Tito a duna Pablo su relato tokante e iglesia di Korintio—ku su ministerio na Korintio tabata eksitoso. Ta parse ku Tito tabata sa bon kon pa trata ku e korintionan tan trabahoso. Despues di risibí e informashon aki, Pablo a skirbi 2 Korintionan i a dun'è na Tito pa hiba e karta bèk na Korintio. (Ta interesante pa nota ku Pablo a menta nòmber di Tito ripitidamente den su di dos karta pa e korintionan 2:13; 7:6,13,14; 8:6,16,23; 12:18²). Tito tambe tabata enkargá pa kolektá yudansa finansiero pa kreyentenan pover na Herusalèm (2 Korintionan 8:16-23).

Anto e apòstel su enkarselashon a tuma lugá (Echunan 22-28) i el a wòrdu transportá pa Roma. Beibel no ta indiká si Tito tabata huntu ku Pablo durante su enkarselashon. Pablo a haña su libertat te despues ku e buki di Echunan ta klousurá i a kontinuá ku su ministerio mishonero.

Un di Pablo su biahenan mishonero despues di su enkarselashon tabata pa e isla di Kreta. Tito a kompañá Pablo riba e biahe aki. Ora Pablo a biaha pa otro sitio, el a laga Tito na Kreta komo su representante ku responsabilidat pa organisá e kreyentenan nobo komo iglesia (1:5). (Esaki tambe tabata loke Pablo a hasi ku Timoteo na Efeso [1 Timoteo 1:3].) Dor ku Tito tabatin tantu eksito ku e korintionan trabahoso, ta parse ku Pablo a haña ku e lo por hasi meskos ku e kretensenan ku tambe tabata problemátiko.

Despues di tempu, Pablo a manda Artemas i Tikiko na Kreta pa remplasá Tito (3:12). El a pidi Tito pa top'è na Nikópolis, pa nan pasa wenter huntu (3:12).

Anto Pablo a wòrdu arestá atrobe. Tito tabata huntu ku Pablo pa un tempu durante su di dos enkarselashon. Anto el a bai na Dalmasia (2 Timoteo 4:10), probabelmente riba intrukshon di Pablo.

Segun tradishon, Tito a supervisá e ministerio kristian na Kreta durante su biehes i el a muri riba e isla ei, un morto natural.

B. ISLA DI KRETA

Kreta ta un isla ku hopi seru den Laman Mediteraneo ku un largura di 260 kilometer i un hanchura variando entre 8 pa 56 kilometer. E ta lokalísá sùit ost di Gresia.

Durante promé síglo, e habitantenan di Kreta tabatin mal reputashon. Nan tabata konosí pa nan immoralidat i gañamentu. Segun 1:12, "*Un di nan, kende ta un profeta di nan mes, a bisa,: 'Kretensenan semper ta gañadó, mal bestia, golosnan floho.'*" Pablo a agregá e palabranan den 1:13, "*E testimonio aki ta bèrdat.*" Asta e verbo griegu KRETIZEIN a nifiká "pa

hasi manera kretensenan”, nifikando pa ta un gañadó. Un outor a skirbi ku e kretensenan no tabata pasífiko pa ku nan mes hendenan, ni tampoko pasiente ku dominio djafó.”

Kiko nos por saka afo tokante iglesia di Kreta? No ta pusíbel pa bisa sigur kon iglesia a originá na Kreta. Ma tin tres pusibilidat: 1) Segun Echunan 2:11, algun “*kretense*” (habitantenan di Kreta) tabata presente na Herusalèm riba Dia di Pentekostes. Ta pusíbel ku algun di e hudiunan di Kreta a kombertí i a hiba e mensahe di salbashon pa medio di Hesu-Kristu bèk na nan isla, kuminsando un iglesia ei. 2) Tambe, durante su promé enkarselashon, Pablo a pasa na Kreta na kaminda pa Roma (Echunan 27:7-13). Ta parse ku e barku a keda einan pa un tempu. Maske Pablo tabata un prisoner, talbes e hendenan di Kreta a tende e evangelio dor di Pablo tòg na e okashon aki. 3) Ora Pablo a haña su libertat, el a bishitá Kreta (1:5). Kisas su bishita kortiku anterior na Kreta a dun’è e deseo pa regresá na e isla. Pablo a bishitá e isla huntu ku Tito. Ma ta parse ku iglesia tabata eksistí promé ku e biahe aki.

Iglesia di Kreta tabatin diferente problema. Nan tabata falta organisashon (1:5), algu ku ta un nesesidat normal ora e iglesia ta kuminsá. Tito mester a desaroyá i apuntá ansianonan pa e iglesianan na diferente stat di Kreta (1:5). Den iglesia tambe tabatin hende rebelde i pleitadó, espesialmente hudiunan, ku tabata kousa famianan kompleto pa desviá for di e bèrdat (1:10-16; 3:9-11). I immoralidat tambe tabata un problema.

III. SKIRBIMENTSU DI E BUKI

Pablo a skirbi e karta aki entre A.D. 62 i 64, probabelmente poko despues ku el a skirbi 1 Timoteo. E el a skirbi Tito mas òf ménos 5 òf 6 aña promé ku el a skirbi 2 Timoteo. Pa mas informashon tokante esaki lesa e kapítulo tokante e *Kartanan Pastoral*.

Nos no sa sigur unda Pablo tabata ora el a skirbi su karta pa Tito. Tin diferente opinion. Algun ta haña ku e apòstel a skirbi su karta ora e tabata na Masedonia. Otronan ta di opinion ku e tabata na e stat di Korintio òf na e stat di Nikópolis, na kosta wèst di Gresia.

E abogado kristian, Zenas, huntu ku Apolo, a biaha pa Kreta. Pablo a probechá di nan biahe pa manda un karta pa Tito huntu ku nan (3:13).

Despues di tempu, e karta aki a haña e nòmber simpel, PROS TITON (“pa Tito”).

Tito i 1 Timoteo ta similar den fecha di skirbimentsu, kontenido, i proposito. Tur dos ta splika ki sorto di hòmbenan ta kalifiká pa ta ansianonan. Tur dos ta enfatisá ku Pablo su representante mester oponé kontra doktrina falsu i proveé siñansa sano. Tur dos ta enkurashá i reta e pastornan hóben. Ma e karta di Tito ta mas kortiku, mas ofisial i ménos personal ku 1 Timoteo. E situashon na Efeso, unda Timoteo tabata pastoriá, a eksigí mas atenshon pa ku doktrina mientras e situashon na Kreta, unda Tito tabata lokalísá, tabatin mester di mas atenshon riba kondukta.

IV. PROPOSITO DI E BUKI

Pablo a skirbi su karta pa Tito ku diferente motivashon:

A. Pa enkurashá i spierta Tito pa hasi uso di su outoridat komo Pablo su representante apostóliko. Pusíblemente Pablo a skirbi e karta pa Tito pa e por proba na e kretensenan ku e tin e apòstel su outoridat pa hasi lo siguiente:

- Pa kompletá e organisashon di iglesia, dor di apuntá ansianonan kalifiká (1:5-9).
- Pa oponé kontra e siñadónan falsu (1:10-16).
- Pa duna instrukshon tokante komportashon kristian, pa nan komportá nan mes na un manera korekto pa ku rumannan den Kristu i tambe pa ku hende ku no ta salbá (2:1- 3:11).

B. Pa instruí i reta Tito i iglesianan di Kreta pa nan komportá nan ku kondukta ku ta agradá Dios.

C. Pa laga Tito sa tokante asuntonan personal—ku e ta bai manda Artemas i Tikiko pa remplas'é na Kreta. Pablo a laga Tito sa ku ora nan yega, e ta deseá pa e biaha pa Nikópolis pa pasa wenter serka dje (3:12).

VI. STRUKTURA DI E BUKI

Debí ku e buki ta asina kortiku, hopi studiante di Beibel tin skemanan masha kortiku tambe.

Robert Gromacki ta surgerí e siguiente struktura pa e buki:

Kumindamentu - 1:1-4

I. DOKTRINA SANO I ANSIANONAN - 1:5-16

A. Nan Kalifikashonnan - 1:6--8

B. Nan Propostio - 1:9

C. Nan Enemigunan - 1:10-16

II. DOKTRINA SANO I E HOGAR - 2:1-10

A. Hòmbernan di Edat - 2:1-2

B. Muhénan di Edat - 2:3

C. Muhénan Hóben - 2:4-5

D. Hòmbernan Hóben - 2:6

E. Tito - 2:7-8

F. Sirbidónan - 2:9-10

III. DOKTRINA SANO I GRASIA DIVINO - 2:11-15

A. Su Deskripshon - 2:11-14

B. Su Deklarashon - 2:15

IV. DOKTRINA SANTU I E MUNDO - 3:1-8

A. Responsabilidatnan Aktual di Kreyentenan – 3:1-2

B. Komportashon Antes di Kreyentenan - 3:3

C. Regenerashon di Kreyentenan 3:4-8

V. DOKTRINA SANTU I SIÑADORNAN FALSU 3:9-11

Konklushon - 3:12-15

Robert Gundry a presentá un struktura mas simpel ku e tres tareanan ku Pablo a duna Tito:

Introdukshon: saludo – 1:1-4

I. APUNTÁ ANSIANONAN KALIFIKÁ – 1:5-9

II. OPONÉ SIÑADÓNAN FALSU – 1:10-16

III. INSTRUÍ BON KONDUKTA – 2:1 – 3:8a

Konklushon – 3:8b-15

A. Resúmen – 3:8b-11

B. Petishon i Instrukshon pa Tito – 3:12-14

C. Saludo i Bendishon – 3:15

Ta parse ku e struktura ku Irving Jensen ta presentá ta kapta e esensia di e mensahe di Tito, maske e no ta organisá asina nèchi:

Titulo: “Dòrna e Doktrina di Dios” (2:10)

Saludo i Introdukshon 1:1-4

**I. LIDERNAN DI IGLESIA TRATANDO KU SIÑADÓNAN FALSU
– 1:5-16**

**II. HASIENDO DOKTRINA KRISTIAN ATRAKTIVO DOR DI
EHÈMPEL – 2:1-15**

III. E BON OBRANAN DI KREYENTENAN – 3:1-11

Konklushon i Bendishon – 3:12-15

VII. OPSERVASHONAN DI E BUKI

A. E buki di Tito ta enfatisá evangelismo

E impreshon ku algun tin di e karta aki ta ku Pablo a instruí Tito pa konsentrá solamente riba e iglesia di Kreta: forma a apuntá ansianonan (1:5-9) i bon trato ku kreyentenan den iglesia (2:1-11). Ma den e karta aki, indirèkt Pablo tambe a enfatisá su deseo pa mas habitante di Kreta bin konosé Hesu-Kristu komo Salbador. Komo resultado e karta ta ekipá kreyentenan di iglesianan di Kreta pa evangelismo efektivo. Nos por nota esaki na diferente manera.

Pa kuminsá, e lidernan di iglesia no solamente mester sòru pa e kreyentenan den nan iglesianan, ma nan tambe mester ta hende ku ta “*sin reproche*” i “*ta tene firme na e palabra field ku ta segun e siñansa, pa e por eksortá ku doktrina sano i refutá esnan ku ta kontradisi*” (1:5-9). Tito tambe mester a instruí e kreyentenan di Kreta pa nan tin bon aktitut pa ku mandatarionan inkomberso (3:1) i tur hende en general (3:2). Tambe Pablo a skirbi Tito pa rekòrdá e kreyentenan di nan pasado sin Kristu i kon Dios a salba nan den Su gracia (3:3-7). Nan bidanan mester ta ehemplar, dunando un bon testimonio dilanti esnan sin Kristu (3:8). Tambe nan mester oponé siñansa falsu den iglesia (3:9). Esakinan ta puntonan indirèkt ku lo kontribuí na evangelismo efektivo.

B. E buki di Tito ta enfatisá bon obra

E karta aki, ku ta kontené un deskripshon klásiko di e gracia di Dios (2:11-14; 3:4-7), ta mensioná bon obra seis biaha (1:16; 2:7,14; 3:1,8,14). (Den 1:16 e teksto griegu ta bisa “bon obra” ma den *Beibel Santu* e palabranan ta tradusí “*nada bon*”.) Tito mester ta un ehèmpel di bon obra (2:7). E kreyentenan mester hasi bon obra (2:14; 3:1,8,14). E siñadónan falsu no tabata sa nada di bon obra (1:16).

Maske Pablo a enfatisá ku no ta pusíbel pa wòrdu salbá dor di bon obra—ma solamente pa medio di gracia—ta bisto ku Pablo ta konsiderá bon obranan esensial. E énfasis riba bon obra ta kòrda nos di e buki di Santiago, kende tambe a enfatisá ku no ta basta pa simpelmente bisa ku bo ta un kristian. Bo tin ku bib’é tambe. Pa motibu di e mal reputashon ku e kretensenan tabatin, Pablo su karta a enfatisá ku e lidernan ku Tito ta apuntá mester tin bidanan spiritualmente ehemplar. Tambe el a laga sa ku hende hòmber, hende muhé, hende hóben i hende di edat atvansá—tur kreyente tin deber di hiba bidanan ku ta harmonisá ku e siñansa ku nan ta proklamá. Dor di henter e karta Pablo a para riba ku e kongregashon mester hiba bidanan diario ku ta demonstrá nan salbashon.

C. E buki di Tito ta mostra ku instruktornan hudiu tabata trastorná e kreyentenan (1:10). Nan tabata “*rebelde...i gañadónan*” (1:10), egoista i kousa divishon (1:11), “*ta profesá ku nan konosé Dios, ma ku nan echonan nan ta nengu’E*” (1:16). E siñadónan falsu aki tabata

diferente for di esnan ku tabata instruí e galationan pasobra esakinan a permití perversidat moral mientras e hudiunan ku a trastorná e galationan tabata legalista.

D. Ta parse ku e karakter di Tito tabata mas fuerte ku esun di Timoteo. Pablo mester a keda enkurashá Timoteo pa no tene miedu, pa e tin kurashi, pa no ta timido. E no tin ku reta Tito di e forma aki mes.

E. Den e buki kortiku aki por haña hopi informashon doktrinal, segun Merrill Tenney: E personalidat di Dios (2:11; 3:6), kalidatnan di Su amor i gracia (2:11; 3:4), Su titulo di Salbador (2:10; 3:4), Kristu Su ministerio komo Salbador (2:13; 3:6), Spiritu Santu (3:5), implikashonnan pasobra Dios ta un trinidad (3:5-6), e divinidat esensial di Kristu (2:13), salbashon supstutushonal dor di Kristu (2:14), salbashon ta ofresé universalmente (2:11), salbashon pa medio di gracia, sin obra (3:5), binida di Spiritu Santu (3:5), hustifikashon pa medio di fe (3:7), santifikashon [purifikashon] di Su puebel (2:14), separashon for di maldat (2:12), erensia di bida etèrno (3:7) i binida di Kristu (2:13).

Literatura Konsultá

- Demaray, Donald E. *Bible Study Sourcebook* (Los Angeles: Cowman Publishing Company, 1964), p. 172-173.
- Gromacki, Robert G. *New Testament Survey* (Grand Rapids, Michigan: Backer Book House, 1981), p. 308-313.
- Gundry, Robert H. *A Survey of the New Testament* (Grand Rapids, Michigan: Zondervan Publishing House), p. 309-310.
- Jensen, Irvin, L. *Jensen's Survey of the New Testament* (Chicago: Moody Press, 1981), p. 384-392.
- MacArthur, John. *MacArthur's Quick Reference Guide to the Bible* (Nashville, TN: W Publishing Group, 2001), p. 282-286.
- Poehnell, Gray. *New Testament Survey* notulonon (Prairie Bible Institute: Three Hills, Alberta, Canada, 1983).
- Tenny, Merrill C. *New Testament Survey* (Grand Rapids, Michigan: Wm. B. Eerdmans Publishing Co., 1980), p. 336-338.
- Wilkinson, Bruce & Boa, Kenneth. *Talk Thru the Bible* (Nashville, TN: Thomas Nelson Publisher, 2002), p. 437-441.